

Ny Valosoa sy hadihady

Tsy hitan'ny fitondrana izay hamahana ny olam-bahoaka mifangiditra

Miha- sarotra hatrany fizotran'ny fiainan'andavanandron'ny mponina amin'izao fotoana izao. Ho an'ny vahoaka dia tsy any amin'ny ady amin'ny fihanaky ny valanaretina loatra intsony ny manahirana sy atahorany. Eo rahateo ny zavamisy isan'andro iainany amin'ny fanenjanana ny fizarana ny fanampiana, na ara-bola io, na ara-tsakafo misy vary amin'ny gony sy menaka, sns..., ka itangoronana sy ifanotofana tsy hanajana ny elanelana intsony. Efa lasa fiainany ireny ary zary tsy misy akony ratsy amin'ny fahasalamany, fa samy mbola miriaria mifankahita avokoa ny rehetra aorian'ny fitangoronana na ny fifanosehana natao. Tsy any ny olany, fa ny tena manahirana azy dia ny olana aratsakafo, ny hisian'ny vola ao anaty kitapom-bolany, ary indrindra ny fiarovana azy amin'ny tsy fandriampahalemana. Ity farany dia tena mirongatra ato ho ato, ary tsy atao hahagaga, satria miseho endrika amin'izay ny fiantraikan'ny fahasahiranana lalina sy ny fahantrana vokatra ny fahaverezan'asa na ny fivelomana sy ny olana ara-tsosialy maro samihafa.

Tsy ny eny amin'ny vohitr'itaosy ihany akory no lasa faritra mena, fa efa saiky ny faritra maro manerana ny renivohitra sy ny manodidina rehetra mihitsy. Raha ho an'ity vohitra nambara no itarafana ny zavamisy, dia tsikaritra ny fanaovana an-tandrevaka ny fitandroana ny tsy fandriampahalemana. Nisy mihitsy ny fahabangana any amin'ireo "poste avancée"-ny polisy napetraka any amin'ireo kaomina eny ary tsy hita intsony ny fisafoana fanaon'izy ireo teo aloha. Nanomboka tamin'ny nidirana tamin'ny hamehana ara-pahasalamana izany.

Mifamatotra avokoa ny zavamisy eo amin'ny fiainana andavanandron'ny mponina. Maivana ny het-sika ataon'ny fitondrana manoloana izany. Miharihary rahateo ny tsy fahavitan'ny fitondrana mitsinjo ny mponina rehetra ao anatin'izao krizy ara-tsosialy izao, mihalalina eto amin'ny firenena izao. Fitondrana tsy mahavaha ny olam-bahoaka.

Sôh'son

Raharaham-pirenena

Préfet de Police mpanampatra fahefana sy ny momba azy

Manoloana ny zavamitranga eto Antananarivo Renivohitra dia zava-dehibe ny tokony hahafantarana ny endrik'ireo rafitra nitondrana ny Tanànan'Antananarivo nandritra ny repoblika nifandimby.

Tamin'ny Repoblika voalohany :

Nofidian'ny vahoaka mivantana ny mpanolotsainan'ny tanàna, ary ireo mpanolotsainan'ny tanàna no mifidy ny ben'ny tanàna, ny Pasitera Andriamanjato Richard no ben'ny tanàna voafidy hatrany tamin'ny repoblika voalohany.

Fa ankoatran'ny olomboafidy dia nisy ny antsoina hoe (DGG) na «Délégué Général du Gouvenement », solontenan'ny fitondrana mitovy laharana amin'ny ben'ny tanàna, Raveloson Clément no anaran'ny DGG farany ary nisy koa ny Préfet na Lehiben'ny Fileovana, izay mbola notendren'ny fitondrana ihany koa.

Marihina fa tamin'ny repoblika voalohany dia boriborintany dimy no nisy teto Antananarivo, fa Ambohimanan'ny tanàna, nisy niova ny rafitra satria Governora miaramila no nitondra ny tanàna, tsy iza io fa ny Komandà Rabetrano, izy no nisahana ny andraikitra ny ben'ny tanàna, Andriamatoa Ratri-Emile no Lehiben'ny fileovana.

Tamin'ny Repoblika faharoa :

Nalevina ny voambolana

hoe ben'ny tanàna, mpanolotsainan'ny tanàna, boriborintany, fileovana sns... fa nosoloina sampanten'ny avy amin'ny fokontany. Mitovy amin'ny fomba nifidianana ny teo aloha ihany no niseho, nifidy mivantana ny mpikambana ao amin'ny komitin'ny firaisampokontany ny vahoaka tany amin'ny fokontany, dia ireo komity voafidy no mifidy ny Lehiben'ny firaisampokontany, izay mifehy mivantana ny firaisampokontany, na ireo boriborintany teo aloha, nisy ihany koa ny Delegen'ny firaisampokontany izay notendren'ny fitondrana, ary ny Lehiben'ny fivondronampokontany izay mitovy laharana amin'ny Ben'ny tanàna ankehitriny dia fidian'ireo komitin'ny fivondronampokontany, izay nofidian'ireo komitin'ny firaisampokontany, fa ankoatr'ireo dia mbola nisy ny Delegen'ny fivondronana notendren'ny fitondrana ihany koa.

Randriananja Charles sy Rakotovoan'ny Andriantiana samy olon'ny Akfm-Kdrsm no nifandimby nitondra ny Tanànan'Antananarivo Renivohitra tamin'ny fiandohan'ny repoblika faharoa, fa taorian'ny fivakisana teo amin'ny Akfm ny taona 1989 dia lasan'ny Arema ny fitantanana ny tanàna na ny tany amin'ny firaisana na ny fivondronana, ka Razanamasy Guy Willy avy amin'ny Fikambanana larivo Mandroso no natolotry ny Arema hitondra ny renivohitra. Notendren'ny Filoha Ratsiraka Didier ho Praimni-

sitra Andriamatoa Razanamasy Guy Willy tamin'ny fitondrana tetezamita ny taona 1991, nohamafisin'ny « Fifanarahana 31 Oktobra » teny amin'ny Panorama izany fahefana izany, ka Andriamatoa Andrianjafy Desirè Lalao no notendrena ho Lehiben'ny Delegasiona Manokan'ny Tanànan'Antananarivo Renivohitra. Marihina fa nanomboka tamin'ny repoblika faharoa dia nikambana tamin'ny Kaomina Ambohimanan'ny tanàna, ka nantsoina hoe firaisampokontany fahenina.

Tamin'ny Repoblika fahatelo :

Natsangana tamin'ny maty indray ireo voambolana efa nalevina tamin'ny repoblika faharoa toy ny hoe; Ben'ny Tanàna, mpanolotsainan'ny tanàna, boriborintany, sns... fa nalevina ny hoe firaisampokontany, fivondronampokontany, ny fokontany sisa notazonina.

Ny nampiafava ny Repoblika fahatelo dia nofidian'ny vahoaka mivantana ny ben'ny tanàna sy ny mpanolotsainan'ny Tanàna, nofidiana misaraka tamin'ny taona 1995, 1999, 2003, 2007, 2019, fa tamin'ny taona 2015 dia nofidiana tamin'ny latsa-bato mikambana ny ben'ny tanàna sy ny mpanolotsainana, ka ny ben'ny tanàna no loha-lisitra, izay no nahatonga ireo kandida ben'ny tanàna lasa mpanolotsainan'ny tanàna.

Fa napetraka ho an'ny Tanànan'Antananarivo Reni-

vohitra ny sata manokana nanomboka tamin'ny Repoblika fahatelo dia ny fisian'ny « Préfet de police », tompon'andraikitra tendren'ny fitondrana ary mitovy amin'ny fahefana nananan'ny « DGG » tamin'ny repoblika voalohany, marihana fa tsy mpitandro filaminana ny « préfet de police » fa Adminitratera sivily teo am-piandohana fa ankehitriny dia manamboninahitra Jeneraly avy ao amin'ny tafika no misahana ny andraikitra.

Nanomboka tamin'ny nitondran-dRamatoa Lalao Ravalomanana ny tanànan'Antananarivo Renivohitra no tena niseho ny fanaparampahefana nataon'ny « Préfet de police » ary mbola mitohy izany ankehitriny amin'ny alalan'ny fanaovana antsojay amin'ny MBS, ALMA, sns... sy ny fanomezana rariny ny ben'ny tanàna mpan-drava tsena ary indrindra ny fanaovana tsinontsinona ireo mpanolotsain'ny tanànan'Antananarivo avy ao amin'ny antoko Tiako i Madagasakara.

Niniana notaterina teto ny endrik'ireo rafitra nifandimby nitondrana ny tanànan'Antananarivo, nisy hatrany ny olomboafidy ary nisy foana koa ireo olomboatendrin'ny fitondrana, saingy toa afaka niarainasa ara-dalàna ihany ny tany aloha tany, fa ny amin'izao fotoana izao dia naboribarin'ny « préfet de police » amperin'asa fa izy dia olona mahatoky ny fitondrana, izay no iraka nampiandraiketina azy.

Ny Valosoa

FITAZONANA TSY ARA-DRARINY

Marary mafy any am-ponja i Rolly Mercia

Marary mafy ao Antanimora amin'izao fotoana ny minitra teo aloha Rolly Mercia, na Harry Laurent Raha-jason, izay sady mpanao gazety. Raha ny loharanom-baovao azo ankehitriny dia efa mankahery tena ny fianakavian' i Rolly Mercia, Minisitry ny serasera teo aloha. Reraka, sady marary mafy any am-ponja ity farany araka ny taratasy mahakasika ny fizaham-pahasalamany. Manoloana io dia mbola mangataka ny famoahana azy vonjimaika hatrany noho izao antony ara-pahasalamana izao ny fianakaviany. Manamafy izany fangatahana izany any amin'ny Filoham-pirenena Andry Rajoelina izy ireo, mba hamelana an'i Rolly Mercia hitsabo tena. Ahiana tanteraka ny ain'io minitra teo aloha io ankehitriny, raha ny angom-baovao azo hatrany.

Helisoa



Ny ministra teo aloha, Rolly Mercia.

TONONKALO

FITONIANA SA FAHAMEHANA ?

Rehefa iarovana ireo olona ao anaty fitondrana, Dia dradraina fa ilaina ilay atao hoe "fitoniana" ? Amboamboarana daholo hatramin'ny didy aman-dalàna, Ho fanavotana ny akama izay misedra fitoriana ?

Aoka hilamina ,hono, mantsy fa ao anaty "fahamehana", Ka aleo hangina kely ny adiady sy ny sisa. Dia novoizina ny hoe : tsy ilaina ny fifanjenjehana, Kanjo ,indrisy, teny ihany , miharo fampandriana adrisa !

Fomba ratsy toy izany no itondrana firenena ? Ny fiarovana ny ratsy , izay no tena ifotorana ? Mbà misaina vetivety dia meteza handini-tena, Sao dia `zao ilay kilasiana ho "fitondrana fozaorana" !

Rehefa entina handavo ny olona tsy tiana kosa, Dia dradraina, arangaranga ilay atao hoe "fahamehana"? Ka na mafy ny "krizy", ny orinasa mihaosa, Dia tsy misy fiantrana fa atao ny fanenjenjehana ?

Mpiasa maro no hiato , tsy afaka hanohy intsony, Fa ny atao hoe "maha olona" dia odiana tsy jerena ? Sao i Dada no tsy tiana sy halanao mpitondra ambony, Ka ny mpiasa efa mahantra no hizaka ny hagegena ?

"Fitoniana", "fahamehana", ampiasaina fahatany Mba hiarovana ny seza sy hanaovana hadalana ? Anao angamba "ny omaly", mety mbola anao "ny androany" Saingy raha "ny ampitso" kosa dia tsy anao fa miomàna !

Raha mitsiry mantsy ny hazo ka mitombo, mihalava, Dia mihevitra ny maro fa ho tratrany ny lanitra. Saingy nofinofy ihany ny an'ireo izay avo vava Fa ny tompon-teny farany dia tsy iza fa Andriamanitra !

TSIMIMALO (02-09-20)